

V E N D I M
Nr. 445, datë 17.8.2000

PËR DISA SHTESA DHE NDRYSHIME NË VENDIMIN NR.408, DATË 31.8.1999, TË KËSHILLIT TË MINISTRAVE, "PËR PRIVATIZIMIN ME TENDER TË NDËRMARRJEVE SHTETËRORE"

Në mbështetje të nenit 100 të Kushtetutës, të ligjit nr.7512, datë 10.8.1991, "Për sanksionimin, mbrojtjen e pronës private, të nismës së lirë, të veprimtarive private të pavarura dhe privatizimi" dhe të vendimit nr.195, datë 20.3.1998, të Këshillit të Ministrave, "Për privatizimin e ndërmarrjeve, që nuk mund të transformohen", me propozimin e ministrit të Ekonomisë Publike dhe Privatizimit, Këshilli i Ministrave

V E N D O S I:

Në vendimin nr. 408, datë 31.8.1999, të Këshillit të Ministrave, bëhen këto shtesa dhe ndryshime:

1. Në kapitullin II, pika 2, të shtohet paragrafi si vijon:

"Agjensia Kombëtare e Privatizimit, brenda 5 ditëve nga mbërritja e dokumentacionit, shqyrton rregullsinë e tij dhe kur e gjen të rregullt fillon menjëherë procedurat e publikimit. Kur në dokumentacionin e dërguar vërehen parregullsi të kërkesave të kapitullit II.1, Agjensia Kombëtare e Privatizimit kërkon plotësimin e tij nga Ministria e Ekonomisë Publike dhe Privatizimit."

2. Pika 1 e kapitullit II.1 riformulohet si vijon:

"Ftesa për tender publikohet në tri gazeta me qarkullim kombëtar, jo më pak se tri herë në secilën gazetë, brenda një afati 30 ditor. Gjatë kësaj periudhe Agjensia Kombëtare e Privatizimit vendos afishe të ftesës për tender pranë vendndodhjes së ndërmarrjes. Vendi, mënyra dhe data e saktë e dorëzimit të ofertave caktohet brenda një afati jo më pak se 15 ditë nga data e fundit e publikimit të ftesës për tender."

3. Në kapitullin IV, pika 1, paragrafi i fundit shfuqizohet.

4. Në kapitullin V, pas pikës 1, shtohet paragrafi si vijon:

"Në rastin e një tenderi të hapur nuk ruhet konfidencialiteti për të dhënat e vëna në dispozicion nga Agjensia Kombëtare e Privatizimit, për ndërmarrjen."

5. Në kapitullin VI, pika 1, shfuqizohet.

6. Në kapitullin VII, pika 3, riformulohet si vijon:

"Komisioni i vlerësimit të ofertave shpërblehet nga 2 deri 5 paga mujore të anëtarit, në varësi të rezultateve të tenderit, sipas përcaktimit të drejtorit të Agjensisë Kombëtare të Privatizimit. Ky komision nuk shpërblehet kur tenderi dështon. Shpërblimi mbulohet nga pjesa e të ardhurave të Agjensisë Kombëtare të Privatizimit prej procesit të Privatizimit."

7. Në kapitullin X, pika 4, shfuqizohet.

8. Në kapitullin XI, pika 1, riformulohet si vijon:

"Vetëm pasi Këshilli i Ministrave vendos për miratimin e procedurave të privatizimit dhe shpall fituesin e tenderit, Agjensia Kombëtare e Privatizimit fillon negociimet dhe lidh kontratën e shitjes."

9. Në kapitullin XI, pika 2, shtohet paragrafi si vijon:

"Procedurat e dorëzimit kryhen në mbështetje të kapitullit IV, të vendimit nr.192, datë 20.3.1998, të Këshillit të Ministrave. Afati për kryerjen e këtyre procedurave fillon nga data e hyrjes në fuqi të vendimit të Këshillit të Ministrave për shpalljen e fituesit të tenderit."

10. Në kapitullin XI, pika 3, shtohen paragrafi si vijon:

Ngarkohet Agjensia Kombëtare e Privatizimit për ndekjen, zbatimin dhe plotësimin e kushteve të kontratës për një periudhë trevjeçare, sipas kritereve të vendosura në ftesën për tender dhe treguesve të parqitur në ofertë."

11. Në kapitullin XI, pika 4, shkronja "e", riformulohet si vijon:

"Agjensia Kombëtare e Privatizimit negocion për nënshkrimin e kontratës me kandidatin e radhës, vetëm pas miratimit me vendim të Këshillit të Ministrave."

12. Në kapitullin XI, pas pikës 4, shtohet pika 5, si vijon:

"Ngarkohen Ministria e Ekonomisë Publike dhe Privatizimit dhe Agjensia Kombëtare e Privatizimit për nxjerrjen e udhëzimit në zbatim të këtij vendimi."
Ky vendim hyn në fuqi pas botimit në Fletoren Zyrtare.

KRYEMINISTRI
Ilir Meta